

NOBLE O. LE
DE VENIS LAOT

1655






The Library of the
Wellcome Institute for
the History of Medicine

MEDICAL SOCIETY
OF LONDON

Accession Number

Press Mark

LE NOBLE, C.



65526/A/1

XVIII 4

CAROLI
LE NOBLE
DOCTORIS MEDICI

& Anatomici Rothomagensis

OBSERVATIONES ~~RE~~ ET NOVÆ
de Venis Lacteis Mesentericis & Thoraci-
cis, deprehensæ in Corporibus Humanis
bene pastis, & post quatuor horas strangu-
latis, mox eiusdem propria manu publicè
dissectis.

*Consentiente æquissimo Senatu Rothomagensi, boni
publici amantissimo, ad postulationem
Medicorum Urbis.*


Ad Clarissimum Virum D. D. IOANNEM
RIOLANVM, &c.



Iuxta exemplar editum Parisiis.

ROTHOMAGI,
Apud IOANNEM & DAVIDEM BERTHELIN FRATRES.

M. D. C. L. V.



Er
m
yb
li
qu
pr
cip
fol
rib
mi
cer

OBSERVATIONES RARÆ
ET NOVÆ DE VENIS LACTEIS
Mesentericis & Thoracicis.

*Eruditissimo & Doctissimo Medico, omnium
Anatomicorum longè præstantissimo, ac Re-
giorum in nobilissima & antiquissima Pari-
siensis Medicinæ Facultate Professorum De-
cano, Domino, D. IOANNI RIOLANO,
eius observantissimus CAROLVS LË
NOBLE, Doctor Medicus in Medicorum
Rothomagensium Collegium cooptatus.*



EA est, VIR ILLVSTRIS-
sime, insignis tuæ doctrinæ altitudo, vt
nesciat quisquis aggreditur eluc-
bratos à te libros legere, vtrum
profundam ingenij tui subtilitatem
minùs valeat assequi, an verò magis debeat
yberem eruditionis fœcunditatem admirari. Il-
li mentis tuæ indefessè laborantis tam mirabiles
quàm ingeniosi partus, mox vt obstetricante
prælo nascuntur, omnium, ne pereant, ex-
cipiuntur manibus; nullius, vt adolescant, non
fouentur sinu: & inter cætera, quæ tuis in Ope-
ribus mira suspiciuntur, hoc omnem superat ad-
mirationem, quod tuos sentias laudatores, quos
censores suspicari debueras, & obtusis suavi, sed

potentissima sententiarum tuarum gravitate,
 inuidorum telis, eos tuæ gloriæ præcones expē-
 riaris, qui seuerioribus æmulandi stimulis com-
 pulsi, se tuorum Operum deuouerant impugna-
 tores. Et certè conceptam de Te opinionem tuis
 longè meritis inferiorem habet, qui omnium æui
 nostri Anatomicorum Te principem iactat; ha-
 bebunt enim à Te futura sæcula, quod præteri-
 torum ignorantiam accusent, & inscitia supe-
 riores Anatomicos iure posteriores possint ar-
 guere: siquidem & antiquis ignota multa in hu-
 mano corpore arcana, oculatissimâ experientia
 indagatione detexisti, & ab ipsis olim inuenta,
 sed multa adhuc confusione intricata, iam ex-
 plicatiùs à Te digesta, locupletius aucta, exactio-
 ri methodo tradita, cui libet nunc facillimè per-
 uia redduntur. In perficienda quidem re Ana-
 tomica, diuturna multaque plurimorum desu-
 dauit industria, sed vni Tibi debet, quod perfe-
 cta sit, & quamuis hanc artem suis omnibus nu-
 meris absolutam nimium credula putauerit An-
 tiquitas, melior tamen ratione persuasa poste-
 ritas sentiet, prima dumtaxat à veteribus iacta
 fuisse huius operis fundamenta; Tibi verò vni
 concessum, manum huic extremam, & vltimum
 complementi fastigium adhibuisse. Plura de tuis
 laudibus hic attexere non patitur, quod ad Te
 scribere me cōpulit argumentum, ne potius gra-
 tulari tibi videar, ob relicta posteritati præstan-
 tioris doctrinae monimenta, quam (quod præ-
 sentis Epistolæ scopus est), tuam *de motu Chyli*
 sententiam impensius efflagitare. Cum enim cū
 semper fuerim erga te mente affectus, vt post-

habitis innumeris quæ de arte Anatomica scripta sunt voluminibus, furtiuas horas, (quas interdiu tractandæ Medicinæ subripio) vigilias, studium, me denique conferre totum tuis libris non præcipiti lectione euoluendis, sed profundâ maturâque attentione expendendis iam pridem assueuerim, refugit animus conceptæ de motu Chyli opinionis quærere censores alienos: Vnum Te supplex petit speratque iudicem, quem vnum iamdiu domesticum cœpit habere Doctorem. Itaque Galeni Consilium, Herodoti exemplum, tuâque ipsius vestigia sequutus, (qui nempe priusquam tuis in libris tuam de Circulatione Sanguinis doctrinam intexeres, dissertationibus Academicis excutiendam & scholaribus impugnandam argumentis ventilandamque exposueris) ego quod sentio de motu Chyli, (quem sanè longè aliter moueri comperio, quàm huc vsque viderim ab Authoribus traditum) nefas esse duxi in Anatomice demonstrationibus, quas in hac Vrbe propriâ, non alienâ manu celeberrime non infrequenter, publicè prius edocere, quàm meam super hac resententiam æquissimæ tuæ censuræ subiecissem, vt si minimè à veritate me iudicaueris aberrasse, hoc saltem mea hæc doctrina cunctis fiat probabilior, quod tui auctoritate iudicij munita, firmata, & stabilita fuerit.

Verùm quia ista opinio in quibusdam conuenit, & in multis discrepat à Pecquetiana doctrina, mihi idcirco, quid sentiam de loco, in quem impulsu Naturæ Chylus deducitur, & quem ad finem illuc aduoluatur, simulque de ratione situs & insertionis vasorum Pecquetianorum, prius

edifferendi necessitas incumbit , quæ quidem vt omnia tuo iudicio submitto , sic quantum potero breuissimè persequar , ne velle tuâ patientiâ abuti, tuique temporis (quod Tibi & Orbi maximè pretiosum est) iacturam aliquam attentare videar.

Nemini non liquet Chylum ab intestinis eiectum in venas Lactæas *Asellij* se recipere , indéque fugitiuo lapsu in *Pecqueti* receptaculum , aut lumbares *Bartholini* glandulas commearé ; hinc etiam per canalem siue canales *Pecquetianos* incedentem , in Venas axillares aut subclauias continuis successionebus influere , vbi in sanguinem incurrens, illique se confusè immiscens , tandem ex doctrina de Circulatione tradita in dextrum Cordis ventriculum αἱματώδης delabitur.

Verum, ex his, vt puto, non conuincitur Cor esse αἱματώδης principium , cum id ista non probet experientia , sed nonnullam dumtaxat Chyli partem in illud deduci , quod esse veritati maximè consentaneum arbitror.

At quis in illo motu Naturæ scopus? quæstionem perobscuram illustrare & intricatam enodare sola ratio poterit. Vt enim parturientis experientie arte ac methodo nata veritas innotescat, sic dum firmatur iudicio , ratione velut nuptice fouetur, & illius irradiatione (quod omnino ad peritum artificem pertinere Plato asseruit) verum non secus à verosimili secernitur , quàm lucis beneficio varij distinguuntur inter se colores, qui tenebris inuoluiti , caligantis oculi fallabant aspectum. Ea propter Galenus optimè & acutissimè artem ante omnes artes rationem nū-

cupauit ; quam quod ausu temerario ducem deseruerint Empirici , eos omnium Scholarum ob abiuratam in administranda Medicina methodum non modò reprehensionem , sed & maleuolentiam subeuntes , in infinitos errores turpiter prolapsos , & in multis quotidie offendere sæpissime audiuius . Et sanè Athenienses dum statuis æneis supra vrbis portam collocatis Vulcani cum Pallade coniugium effinxerunt , maximè putandi sunt innuisse artes labore simul & ingenio comparari ac perfici , idèmq; videtur à Platone adumbratum , cùm in mundi diuisione eandem Mineruæ & Vulcano partem dixit obtigisse .

Quandoquidem igitur ducem licet in hac materia rationem sequi , liberè dicam mihi non probari , tametsi Cor excipiat chyli partem , in eo virtutem inesse sanguinis productiuam , aliud enim inferius adscriptæ rationes euincunt , & dum id munus ad jecur pertinere statuitur , illico minimè Cordi conuenire demonstratur .

Si autem duæ partes natura & temperie inter se dissimiles , disiunctæ situ , & molis constitutione diuersæ , virtutem in agendo similem haberent , eadèmq; possent exequi munia , inde omnino contingeret vt vitiati iecinoris damna , viuida sani cordis actio resarciret , illudque rueret vulgatum antiquitus in Medicina pronuntiatum , quod scilicet vnius officialis partis error nulla alterius operatione reparetur ; & vt ex hac præcipua Galeni regula , ubicumque aliqua pars operationem habet nulli alteri communicatam , necessario etiam habet propriam temperiem per

quam edit eam operationem, ita ubicumque propria constitutio & peculiaris temperies reperitur, ab ea quoque parte propriam operationem, neque alteri communem emanare necessum est concludere.

Quanam obsecro fingi potest cordis actio tam vegeta & efficax, ut fugacem chyli substantiam ac celeri motu transeuntem vertat in sanguinem?

Qui fieri poterit, ut materia nouæ formæ substituatur, nisi præuiis ad ipsam dispositionibus idoneè præparata? has autem quis tam breui & quasi momentanea Cordis agentis applicatione dicat posse sufficienter induci, ut in ipso transitu & quidem satis veloci, tam præceps chyli alteratio, tamque subita sanguinis generatio sequatur? profectò aut ad istiusmodi transformationem prorsus necessaria est chyli retentio & subsidentia in corde sufficiens, & ad congruam usque temporis mensuram prorogata, aut procul amandandus est Philosophus, qui inter cæteras ad perfectionem actionis conditiones, hanc potissimum requirit, ut continuo debito temporis interuallo, passo conjunctum & applicatum sit agens, nempe cum agentis creati virtus finita sit ac debilis, nequit in instanti perfici eius operatio, sed per successiuas temporis moras vim actionem exerens non sine conuenienti temporis tractu intentum à natura effectum producere potest.

Ista deinde cordis actio eximenda foret à communi operandi lege, cæteris corporis partibus à natura ad suas ipsarum actiones inuiolatè præstituta, quod videretur absurdum, sine firmo

fundamento asserere. Nunquid à pyloro tamdiu
 sistitur alimentum in ventriculo ; donec transeat
 in chylum quidquid in eo substantiæ melioris at-
 que purioris est?

Nunquid ipsummot sanguinem ac spiritus ma-
 gis defæcatos & subtiliores, à quibus immediatè
 semen coalescit, vt prolificam à testiculis virtu-
 tem accipiant, necesse est diu in canalibus sper-
 maticis immorari, siquidem sine iusto temporis
 spatio non potest ille humor, licet fluidus &
 λευκοερής, longa vāforum deferentium curricula
 multis & labyrinthicis inter se plexibus irretita
 sensim effluendo permeare?

Nōne tandem, tametsi & sanguine perfectis-
 simè elaborato à natura generentur spiritus ani-
 males, mira tamen eiusdem Naturæ prouidentia
 præter rete mirabile in circuitu sellæ ossis sphen-
 oïdis singulari artificio protensum, adhuc in
 ventriculis plexum choroidem efformauit, vt il-
 le sanguis tot & tam exiguos, tōtque nexibus in-
 tricatos anfractus pedetentim excurrendo, sic ibi
 longo detentus hospitio, impressum tandem tar-
 da præparatione facultatis animalis sigillum at-
 que characterem acciperet.

Valet etiam ad id comprobandum quod tam
 verè dictum est à Galeno, quam studiosè obser-
 uatum, scilicet venulis innumeris & mirabiliter
 insertis esse jecur vndique plenum, vt chylus in
 illis diutius retentus & tandem in parenchyma-
 tis substantiam expressus, ab ipsius caliditate ve-
 lut vinum musteum feruere, concoqui, alterari
 in laudabilis sanguinis generationem posset. In
 hac autem ebullitione ex ipsis excrementis quod

feculentum quidem est ac crassum subsidere ; in-
 natate verò quod tenue est & leue, ac veluti spu-
 mam quandam in sanguinis superficie fluitare.
 Postquam verò hac ratione generatus est ac præ-
 paratus sanguis, in Cor vltimò perficiendus solitis
 vehiculis deducitur ; binos enim cordis ventricu-
 los traiciendo non semel (nam diutina circula-
 tione rursus illuc iterumque reducitur) vitalis
 facultatis irradiatione & impressione donatur.

Illud autem munus frustra cordi tribueretur,
 si sanguinem gigneret, cum non constet esse à na-
 tura eidem parti officiali concessum , vt tam di-
 uersa operetur ; & præterea si non potiori , certè
 non inferiori ratione dici possent pulmones *ai-*
mentis officina, quod illuc etiam, ex Circula-
 tionis doctrina , deferatur Chylus , & ibi diu-
 tius resideat , quàm consistat in Corde , ex quo
 dum motu continuo celeriter egredi compellitur,
 nullum ei in eo conquiescendi spatium relinqui-
 tur.

Verùm si iecinoris compositio meæ fauceat sen-
 tentiæ , eius etiam magnitudo atque color *Pec-*
queti doctrinæ non parum aduersatur ; ex iis
 enim satis intelligitur , aliud esse natium huius
 visceris officium , quàm vt bilem à sanguine (eo
 quo explicat modo *Pecquetus*) fecernat , quam
 sola fellis vesicula , mira secretionem separare po-
 tuit, & in sese velut magnetica virtute attrahere ;
 vtque renes eundem sero repurgant , si noua ista
Pecqueti opinio ratione aliqua niteretur , magni-
 tudine renes iecur superare debuissent , quemad-
 modum bilis quantitas feri excessu vincitur ; re-
 nes enim , inquit *Bartholinus* , (*Pecqueti* quæ-

Quos) bini reperiuntur, quia inter omnia excrementa serosum est copiosissimum, & utramque bilem excrementitiam superat, ob sanguinem cuius vehiculum esse debet: Cum insuper forsitan maiores ea ratione facti fuerint, ut ex *Aristotele* post *Hippocratem*, utrinque positi, Venam Cavam velut anchoræ iactæ stabilirent.

Aut certè si segregando huiusmodi excremento præcipuè deseruiret nobilissimum illud viscus, animalia in quibus magis abundat bilis, & fellis vesicula magis patula & spatiosa est, jecur proinde amplius & crassius habuissent, cum tamen doceat experientia in homine vesiculam quidem fellis angustiores esse quam in multis animalibus, jecur autem magis dilatatum & amplum, quàm in illis, ex omnium Anatomicorum consensu, tuoque inprimis testimonio, (modò conferatur cum iecinore aliorum animalium eiusdem magnitudinis) & ut notavit idem *Bartholinus*, magnitudo & crassities hepatis in homine insignis & maxima (uti & cerebrum) non tantum ob nutritionem, quemadmodum in brutis, sed ob spirituum animalium procreationem, qui dissipantur sæpius, (& ex vitalibus generantur, hi verò ex sanguine) & magis ob varias in homine functiones. Hæc præterea subiungit idem *Auctor*, maius tamen est hepar in frigidioris intemperiei corporibus, & in timidis & gulosis, ut calor Cordis augeatur; Ex quibus non obscure consequitur, quod ad illud convertere chylum in sanguinem pertineat, non autem hunc solummodo transcolare, admixtaque bilis expedire confortio.

Atterea, quod spectat ad colorem, flavescenti potius tingeretur, quam rubicundo (qualis tamen in hepate sano cernitur) cum, ut ex Pecqueti loquar, sicut tinctorum assolent iisdem colorum notis circa quos operantur, manus inficere, ita omne eorum contractum transeundo, excrementi, quod excernitur colorem non parum referre certum sit & exploratum.

Ceterum icterus qui inflammato hepati succedit, dum eo accenso totus subinde sanguis inflammatur, & in tantam alteratur bilis copiam, ut redundante fellis vesicula, flavescentis huius humoris effusior alluies crassorum excrementorum, urinarum, totiusque corporis nativum colorem inficiat, ac depravet, consequenter probat in hepate sanguinem preparari; nulla enim Cordis vel ardentissima intemperie tanta in eo tamque velox perfici potest alteratio.

Nec frustra etiam commemorabo illud morbi non ignotum genus, quod oves manifestum est contrahere ex comesto ranunculo flammeo, vulgò à Pastoribus nuncupato Gallico vocabulo *De la Douve*. In illis scilicet reperitur iecur omne infectum & corruptum, sæpe vesiculis innumeris aqua refertis undique plenum, semper autem animalculis siue bestiolis soleæ piscis similitudinem referentibus scatens, à quibus dum gregatim in eo generantur, inficitur, corroditur, totumque tandem aliquando absumitur; Cuius putredinis semina in illius visceris partibus Venæ portæ ramos fulcientibus primùm expromuntur & expullulant, propter, ni fallor, venenati & erodentis chyli aduentum, nec mirum

si lanij & opiliones ex quarundam oculorum Venarum subfidentia (labefactata ob iecoris atoniam hæmatosi) oues hac labe conspurcatas ominentur , & tamen huiusmodi lues nullum deprehenditur peculiare Cordi detrimentum afferre , quod certè potius quàm jecur , hoc tabo inquinari ac deprauari oportuisset , nisi primùm in hepate chylus sanguini gignendo destinatus alteraretur , & nisi pars altera quæ in Cor impellitur , præcipiti traiectione continuò expelleretur , vt ex rationibus inferiùs afferendis patebit evidentiùs .

Facit etiam ad confirmandam opinionem meam , Venarum Lactearum Asellij exilitas ; habita enim corporis ratione aliarumque Mesentericarum , illæ non modò minores , sed numero longè pauciores existunt .

Fauet perangustum chyli receptaculum .

Fauet arctior pressiorque capacitas Pecque-
rianorum canalium , siue canalis (vt plurimum enim reperitur vnicus :)

Suffragatur quoque longè amplior ac numerosior Venæ portæ in varias partis inferioris hepatis regiones fruticosa ramificatio , quam Cauæ in superiorem distributio (quos Venæ portæ sicut cauæ ramulos in iecinoris substantiam dispersos incerniculi instar foraminibus innumeris perzussos obseruauimus .)

Illam etiam roborat Mesentericarum maior amplitudo , & numerus sane copiosior quàm requiritur ad sanguinem ab arteriis excipiendum , deferentibus nutrimentum ad intestina , quæ quidem si ratione pabuli delati omnes ad ipsa , ista

Venæ pertinerent , portione sanguinis ac spirituum multò maiore quam cerebrum , indigerent. His adde quod si arteriarum magnitudo & multitudo obseruetur , constabit omnino prædictas Venas numero pauciores , & amplitudine minores esse debuisse.

Vrgent tandem pro tuenda huiusmodi doctrina, viæ quas solet subire sanguis ex matre ad fœtus attrahentis alimentum transmigraturus , siquidem nullus ambigendi locus est , quin priusquam ad Cor pertueniat , ipsos ingrediatur meatus hepatis , vt ibi de nouo alterari & perfectius concoqui valeat , indèque paratior egressus necessariam toti nutriendo corpori vitalis facultatis impressionem facilius & cautius recipiat.

Quibus omnibus posthabitis, si quis iterum ad laudatam experientiam refugiat , enixè eum obtestor, vt manifesto & consociali connubio circulationem sanguinis attributæ Cordi hæmatosi iungat , aperiâtque vias , per quas expansus in vniuersum corpus per arterias sanguis deferatur ad iecur in eo expurgandus.

Quâ viâ etiam suppositâ , hucusque tamen legitima & probabili incognitâ , subsistet adhuc altera absurditas , sanguinem cum excremento bilioso in partes nutriendas diffundi.

Complures alias rationes prætermitto , quæ iam à Te & ab aliis in medium prolatae sunt, aut quæ recenter inuentæ superioribus possent adiungi.

Huius quippe opinionis nouitatem non arbitrator sectatores habituram , cum præsertim quos non dubitamus Pecquero adfuisse , propugnatores

eos videremus illi hac in parte sequaces defuisse.

Sufficiat itaque præmissa aduersus *Pecqueti* doctrinam probauisse, vt nunc iure possim affirmare maximam chyli partem per Venas mesaraicas transuectam in iecur induci, eiusque naturali actione in sanguinem conuerti, &c.

Nec opinioni meæ quidquam debet officere, quod in istis Venis chylus intuentium oculis subducitur, huius nimirum rei rationem studiosius indaganti facile patebit, id omnino ex mutuo chyli sanguinisque occurso, & eorum reciproca admixtione contingere: Non secus ac vbi primum ramos axillares aut subclauios chylus subintrauit, nulla potest illico sui specie distingui, illum enim ait ipse *Pecquetus*, ex primo cum sanguine commercio rubescere, quemadmodum aqua vino infusa vincente albedinem rubore, vini speciem coloremque induit.

Alteratam autem chyli partem magis scilicet aquosam, & liquidam contendo itineribus, à me superius indicatis, illapsam in Cor tandem induci; non quidem vt eius operatione facessat in sanguinem (quia id munus ad solum iecur pertinere dicimus;) sed vt simul cum sanguine vitalis facultatis sigillum fecunda Cordis & mira irradiatione communicatum, subinde referat, ad frigidiore & humidiores corporis partes contemperata nutritione vegetandas, quibus certè non dubitandum, quin congruum, familiare & idoneum hoc alimentum Natura dicauerit.

Si enim totum chylum iecinoris facultas mutasset in sanguinem, conuenienti naturæ suæ alimentum partes istæ caruissent, siquidem frigidio-

10
tis partis temperamentum meri sanguinis caliditatem velut sibi noxiam & contrariam respuisset.

Hanc porro aquosiorē esse chyli partem, quæ ad Cor transmittitur, ideoque frigidioribus partibus humidioribusq; nutriendis destinatam, & sicut aquam vino, sanguini temperando superadditam, admodum ex eo fit probabile.

Quod, ne perfectius alteraretur, omni intercluso iecinoris aditu, ipsam ab altera, mirabili secretionē diuulsam, per angustiores ac tenuiores Venulas immissam recta in Cor, occultiore quidem, sed breuiori tramite Natura depulerit, alteram verò partem magis scilicet viscosam, protractis in obliquum itineribus, laxioribus certè & patentioribus, prius in iecur abduxerit, in idem Cor, mox adeptâ mutatione traducendam.

Nec profectò putandum est, *Venulis Asellianis* casu aut temere suam exiguitatem exilitatēque contigisse, sed sic fuisse secretissima Naturæ intentione effictas, non solum quia merum chylum (cùm cæteræ Mesentericæ sanguinem vnà cum chylo contineant :) sed etiam quia minorem ac liquidiorē chyli quantitatem excipiunt, ideoque tenuissimas esse oportuit, vt chyli in hæc duo meatuum genera ab intestinis inieci: (imò etiam ab ipsis canalibus vtcumque peculiari ac propria attrahendi facultate acciti :) pars liquidior magisque defæcata in *Asellianas* Venulas irreperet; crassior autem magisque fibrosa, spiritibus tamen prætumida, in cæteras Mesentericas influeret. Si enim : (quod omnino arbitror) ex illarum Venarum inæqualitate, earum poros & ingressus inæquales esse coniicere liceat, planè constabit,

bit, per *Asellianarum* exiguos & angustissimos
aditus crassiorem Chyli substantiam non posse
admitti.

Ex quo fit, vt hac opinione positâ, nemini
posthac mirum videri debeat, quod in serosum
humorem tam citò resoluatur Lactearum Chy-
lus, vt pote maximè aquosus.

Et quia Sanguis, qui ex partibus superioribus
relabitur, pristinaque vt iterum circumagatur,
remittitur vestigia, sparsam non modicam spiri-
tuum & humiditatis copiam reliquit in locis,
quæ irrigauit, nutriuit, roborauit, crassior idcir-
co remanens & tardior effectus non ita facile po-
tuisset labyrinthos Circulationis anfractus per-
meare, ideo Natura sapienter æque ac ingeniosè
vasorum *Pecquetianorum* situm insertionemque sic
disposuit, vt benefica Chyli coniunctione sanguis
antequam Cor subeat, adiutus ac fluidior reddi-
tus, volubiles ac sinuosos Venæ arteriosæ, & arte-
riæ Venosæ meatus, (aut iuxta tuam opinionem)
Cordis septum medium longè faciliùs & fluxu le-
uiori traiceret. atque vt alterâ Chyli portione,
sanguis in Mesentericis Venis contentus, ad faci-
liorem Circulationem diluitur, & nouorum spi-
rituum aduentu ditescit, ita sanguis recenter in
Hepate ex ea Chyli parte generatus, iungitur san-
guini, qui per Venam Cavam ascendentem rur-
sum reuehitur, eique suos spiritus impertit, flui-
ditatemque communicat, propter ingentem, quâ
ex Chylo contraxit atque retinuit humiditatem.
Circulationi maximè conducentem, ac perne-
cessariam.

Præterquam quod etiam istud fluiditatis in-

crementum in prædicto Sanguine videtur non nihil augeri ex occurſu, & admixtione ſcenden- tis Sanguinis utpote fluidioris.

Et certè niſi Chylum in Iecur Natura tranſ- mitti voluiſſet, plures proculdubio Lacteos ra- mos, aut ſaltem vnum eo ſine protenſum in Ve- nam Cauam, quæ ab Hepate ad Cor uſque per- tingit, inſeruiſſet.

Quod ſi quiſpiam, ut rationis à me allatæ vim eludat, negauerit Sanguinem ob iſtam chyloſæ humiditatis adiunctionem reddi fluidiorem, fa- teatur ſaltem neceſſe eſt, rationem idcirco à ſe mi- hi reddendam eſſe, cur igitur Natura Chylum non recto & immediato tramite in Cor depulerit; & quare illum deuio itinere abductum priùs in Ve- nas ſubclauias aut axillares deſlexerit?

Verùm, quis neget exactiori Chyli commercio fluiditatem Sanguini accreſcere, id proſecto ne- mini dubium eſſe poterit, qui matura obſeruatio- ne tantam eſſe deprehenderit aquoſam Chyli hu- miditatem, ut paucis poſt mortem horis interie- ctis, ſi tam in receptaculo, quàm in Lacteis maxi- mè *Pecquetianis* inquiratur Chylus, etiauiſſe to- tum, & in ſeroſum humorem reſolutum eſſe ma- niſeſtè comperiatur.

Et quàmuis inſint in Chylo prima fibrarum vi- ſcoſitatique ſanguineæ ſemina, tantà tamen miſ- centur & obſcūrantur ſeri copiâ, ut nonniſi eo priùs, accedente perfectiori coctione, magna ex parte conſumpto, necnon per renes excluſo, illa ſeſe prodere ac maniſeſtare incipiant.

Iam verò ut retegam Chyli motum in Lacteis contenti, qui ex lumborum motu ſequi nunc af-

seritur, nunc peristaltico intestinorum impulsu fertur excitari, quandoque creditur ex ventris musculorum contractione oriri, & nonnunquam Diaphragmatis, & aortæ verberationi tribuitur aut etiam teste *Pecquero*, respirationi, in qua dum pulmones dilatantur, etiam deorsum Diaphragma premunt, iecurque, quod tum pistillum agens succutientis per intervalla molis grauvine non solum adigit Chylum è ventriculo per pylorum in intestina secedere, sed & eorum distendit porulos, illacque subtilissimam impellit in Lacteas alimenti substantiam, &c.

Non diffiteor quin harum partium motus; mouendo in Lacteis Chylo, non mediocre præstet adminiculum; & quin hac iuuamenti ratione in Venas *Acellianas* compellatur, sed ubi primum illuc receptus est; tum ipsum opinor, sensum, nullo etiam extrinsecus impellente, sed solo motu peristaltico his canalibus à Natura indito adactum in ramos axillares aut subclavios introduci.

Meam porro opinionem eò certiore existimo, quo minus dubia nititur experientiâ; quæ facile cuilibet probabitur, qui patentibus incisione viui animalis visceribus exactius obseruauerit, quæ (præmissâ ad id præparatione requisitâ) omnino gerenda esse à me in sequentibus commemorantur.

Statim igitur atque canis, aliûsve cuiuscunque viui animalis pectus & viscera sectio aperuerit, mox canalis siue canales *Pecqueriani* ab aorta distrahendi sunt; & ab omnibus contignis partibus separandi, maximèque ab œsophago

(cui propter communem vtriusque Membranam quam hoc in loco desumptam à pleura mutuantur, arctissima connectione adhærescunt) tum in parte superiori ad sistendum omnino Chylum stric-
tissimo vincendi nexu , ac tandem nullo in inferiori parte arctati vinculo , iuxta receptaculum abscindendi. Post sectionem isto modo peractam, illico animadvertitur Chylus sursum contendere , eoque ipsius vehicula superius circulari corrugatione manifestè distendi , tumescere, inflari , & ob valvularum multitudinem variòsque sinus à nexibus efformatos ampullescere , ac veluti rugarum voluminibus obduci ac delineari, inferius verò omni exhauriri Chylo , & extenuari. Hunc vero Chyli motum , quis dixerit à cæterarum partium motu pendere , quas in allata experientia nihil prorsus conferre ad mouendum Chylum certissimum est : Imò nec in ipsam Cordis attractionem , illum refundere prodesset, siquidem prædicto vinculo omnis ligata manet & interclusa Cordis attrahentis actio : Nec certè immoto superiori Chylo moueretur inferior , nec ut sursum irreperet, tanta contentione consensionem moliretur.

Verùm , tametsi meam experientiam in canaliculis *Pecquetianis* exhibuerim (ut pote quorum magnitudine & longitudine redditur exploratior) idem tamen non frustra tentari potest in Venis *Asellianis* , sed pari omnino successu comprobari. Etenim illæ ab intestinis disjunctæ, aliisque partibus quarum possent beneficio moueri , Diaphragmate etiam frustatim inciso , & omni operandi facultate priuato , motum nihilominus pe-

ristalticum, sibi à Natura insitum apertissimè demonstrant. Illud profectò fit manifestum, dum Vena in medio ligatur, Chylo scilicet, qui receptaculum inter & ligaturam interiacet, toto in receptaculum secedente, & eo; qui in altera Venæ parte continebatur, iuxta ligaturam copiosius affluente, non aliter, quàm de canalibus *Pecquetianis* dictum est. Nam Vena qua parte iungitur intestinis, Chylo exhausto vacuatur, & qua ligaturam tangit abundantius plena se multis quasi rugis obuoluens supra modum intumescit.

Nec puto probabiliorē posse reddi rationem, cur tunicam Lactearum propriam adeo tenuem & exilem Natura effinxerit, nisi quod ita formari debuerat, vt hinc naturali constrictioni paratior inseruiret, & promptior obsequeretur; eo etiam sine tanta abundat valuularum multitudine, & tam variè inter se dispositarum, vt Chyli, qui motu peristaltico in receptaculum, & inde in Venas axillares aut subclauias impellitur, nulla quantulacumque pars in intestina remeare possit.

Hoc autem in prædicta canalium *Pecquetianorum* præparatione manifestissimè constat, ex quibus licet in inferiori parte resectis nulla prorsus Chyli portio elabatur. Nec alia huius Chyli, maxime fluidi, suspensionis causa fingi potest, nisi quod & motu peristaltico sursum adigitur, & valuularum dispositione, ne deorsum effluat retinetur. Quicquid ergo fluentis leuitatis spiritibus animalibus sua tribuit Naturæ subtilitas, puritasque substantiæ; quidquid contento in Ve-

nis Sanguini liquidæ celeritatis accedit; ex impulsione Sanguinis arteriosi, & quidquid in hunc mobilitatis ex Cordis arteriarumque Systole transfunditur; id Chylus debuit ex motu peristaltico Lactearum peculiari ac proprio, sibi vindicare, cum præsertim eius substantia careat æthereis illis qualitatibus ad excitandum ab intrinseco motum idoneis, atque canales in quibus defluit nulla Synanastomosi aliis vasis cohæreant ex quibus motum necessarium desumere potuissent.

Hucusque, VIR ILLUSTRIS SIME, meæ, de hac noua doctrina opinionis, rationumque quibus ad id sentiendum moueor, tam rudis & impolita, quam breuis & compendiosa propriè expositio.

Sed quia (vt legitur in sacris paginis) *cogitationes mortalium sunt timide, & incertæ sunt prudentia nostræ*, in mea sententiâ nihil volui esse securum, nihil certum, nisi quod tui authoritate æquissimi & nunquam fallentis iudicii probatum ac firmatum extitisset. Itaque Te, per eam quam meritissimis officiis ab omni Medicina consequutus es laudem, & gloriam, enixissime obsecro, atque obtestor, vt mihi pro tua singulari in omnes beneuolentia & humanitate, significare digneris, quid probes in mea opinione, aut quid in illâ improbes, ne dum forsan aliis tentarem persuadere, quod mihi suadet experientia esse certum, in eas me angustias temere compingerem, in quas virum percelebrem imprudens redegit audacia, qui biennij circiter spatio suam de *Hæmicosi* sententiam quater immutauit. Er-

ratum quidem agnoscit, dum emendat, & si ve-
 ritatis sit noua sentire, certe inscitæ aut impru-
 dentia fuit pristina sensisse. In id sine dubio non
 incidisset inconstantia dedecus, si *Senecam* audis-
 set monentem, vt sua quisque tum cogitata, tum
 opera Viri sapientis iudicio permittat, aut *Gale-
 num*, cuius perpulchra hîc verba subtexui: *Qui-
 cumque*, inquit, *aliis permiserunt*, vt de seipsis fer-
 rent sententiam, *hos in paucissimis aberrare solitos*
animaduerti: At quicumque seipsos esse maximos
 existimarunt, nec aliis iudicium sui ipsorum facere
 permiserunt, hos contra, & in maximis rebus & in
 plurimis offendentes insexi. Caterum, si verita-
 tem non omnino attingi, inculpabilis tamen cona-
 tus censendus est, latentem quærere & scrutari
 veritatem nemini vitio vertitur, & si non inue-
 nisse sit infelicitatis, tamen inuestigasse virtuti
 tribuendum est. Quod idem optime subindica-
 uit *Galenus* his verbis. Audendum est, inquit ille,
 & veritas inuestiganda, quam licet non assequa-
 mur, omnino tamen propius quam nunc sumus, ad eam
 perueniemus. Quamlibet igitur in partem tuum de
 mea sententia iudicium ratio & veritas Tibi nun-
 quam ignota, inflectat, illud tamen animo meo
 relinquatur solatium, quod hac data ad Te scri-
 bendi occasione, & meæ summæ erga Te obser-
 uantiæ monumentum aliquod, & debitum gratæ
 mentis obsequium non importunè Tibi exhibere
 potuero.

Hoc enim me Tibi fateor debere cum ceteris,
 quod Medicinam & Anatomiam, magnâ hacte-
 nus ex parte incognitam sic illustrasti ac perfeci-
 sti, vt posteri suspicient omnes, quæ huic incre-

menta præstiteris , nullusque quidpiam addere , nisi frustra sit tentaturus. At me plus cæteris Tibi deuinxit diuturnior & suauior editorum à Te librorum lectio , quos quanto pluries relego , tanto profundius penetro , & si vel semel legisse plurimum profuit , tanta tamen est tuæ fœcunditas eruditionis , vt magis adhuc repetita lectio proficiat ; in tuis enim libris fons scaturit doctrinæ nunquam exsiccandus , vt qui semel ex eo scientiam hauserit , plures adhuc & maiores in immensum tuæ doctrinæ thesauros possit & inuenire & sibi comparare. Eousque certè tantus euasisti , vt meliori ratione quàm *Lucretius* , *Vir Diuinus* , atque incomparabilis , & veriùs quàm *Cornelius Gemma* , doctrinæ miraculum possis ac debeas nuncupari. Quid mihi nunc superest , nisi votis Diuino Numini nuncupatis , tibi venerabilem , felicem , eximiis adhuc operibus fœcundam , & in multos annos prorogatam senectutem exoptare ac promereri , vt tuæ gloria tuis in æternum meritis adæquata crescat in immensum , & apud posteros salua semper seruetur & incolumis.

Hanc Epistolam iam fermè tabellario daturus cùm accepissem fures quatuor in carcerem nuperrimè coniectos , morti non paulò post addicendos esse , ad Te mittendam in aliud tempus distuli , vt impetratis à Senatu nostro demortuorum cadaueribus , subscriberem quidquid in homine de *Chyli receptaculo Venisque Pecquerianis* diligentiori inspectione obseruasset. Oblato igitur eo fine , summis Iudicibus , supplici libello , non inuitè concesserunt duorum corpora , vnum si-

gillatim arte Anatomica pro more meo publicè
 dissecandum : alterum ad explorandum , an *Ve-*
na Lactea in homine ac brutis essent similes ; adeo-
 que an *Bartholinus* , qui solus de his in homine
 repertis ex instituto scripsit , rem omnino , vt se
 habet , narrando attigisset : id verò vt faciliori
 possem & certiori experienciâ consequi , ab iis-
 dem supremis Iudicibus obtinui , vt reis præbe-
 rentur alimenta antequam sua ipsis mortis sen-
 tentia denunciaretur , & vt horâ à comestione
 circiter quinta aut sexta , suspendio præfocatis ,
 ynum statim , & nullâ post mortem interposita
 morâ , (eum scilicet , qui plus comederat) lice-
 ret ad experienciâ assumere. Huius itaque cum
 cadaver incisione aperuissem , calentibus adhuc
 & fumum exhalantibus visceribus , coram mul-
 torum in Suprema Neustria Curia Præsidentum ,
 Senatorum , aliorumque Nobilium & Collega-
 rum meorum clarissimo atque amplissimo cœtu ,
 palam ostendi primum Mesenterium Venis La-
 cteis Chylo turgidis totum respersum esse. De-
 inde interiora scrutatus , repertum in eadem cor-
 poris humani regione , in qua situm esse visitur in
 brutis , receptaculum , explanatè proferens in me-
 dium omnium oculis eulentissimum exhibui ,
 nec vllatenus nobis (aut certè parum) à bellui-
 no visum est (quidquid scripserit *Bartholinus*)
 formæ specie diuersum esse. Perspeximus enim
 corpus cauum , Cellulis diuisum intus & interse-
 ctum magnitudine ac figura inæqualibus , constans
 & obuolutum Membris tenuissimis , mollissimis ,
 glandulis distinctum , copiosâ circumfusus adipe ,
 infinitâque implicatum fibrillarum multitudine , qua

vicinas partes, sed maximè Aortam nexu arctissimo complectebantur. Huius longitudo fere semipedalis erat, latitudo superior trium quatuorve digitorum, sed à summo paulatim decrescens, in ima angustior & constrictior existebat. Producti ex eius parte superiori duo Canales Thoracici longius pro-
 tendebantur, quorum dexter crassitie pennam anseris exæquabat, sinister verò longè exilior erat. Ambo minutis glandulis, & pinguedine abundabant, & in multos flexus sinuososque anfractus, in quibus videbantur in vnum coire, variè contorri, tandem adeo perfectè post medium sui curriculi spatium sibi inuicem iungebantur, ut ex duobus iam vnus remaneret sinister Canalis, qui trium quatuorve ramulorum beneficio in subclauiam sinistram, & totidem in eandem Venam dextram influens illic totus affigebatur.

Sed Doctissimus quidam Medicus renuit fateri id quod à me monstrabatur esse receptaculum. Verùm, cum ad id comprobandum, illud in parte superiori incidissem, magna illico exiliuit Chyli copia, feri lactis speciem præferentis, quod tamen, quia nimis aquosum erat, & natius colore imminutum, dictus Doctor Medicus pernegabat esse Chylum, idque quod ipso vidente effluerat, nihil esse præter meram aquam affirmabat. Ego autem, ut eius opinionem refellerem, vel potius meam confirmarem, Bartholini obiciebam authoritatem, ipsamque quotidianam experientiam, ex quibus manifestè constat, Chylum in serosum humorem faciliè pauld post mortem resolui, nihilque ferè semper nisi viua sentur animalia, in Venis Lacteis Thoracicis

præter serosum humorem inueniri. Cùmque constantius assererem serum hoc albidum potius dicendum esse Chylum, quàm aquam, eò quod ad Chyli propius, quàm ad aquæ similitudinem, & colore & corporis consistentia accederet, illè contendeat aquam non multò dissimilem contineri in vasis *Lymphaticis Bartholini*, ex quibus illuc defluere potuisset. Verùm amicam illam disceptationem, quam sola mouerat ytrimque veritatis explorandæ cupiditas, omnino diremit, ac sustulit vel leuissima receptaculi compressio; Cùm enim quæ facta fuerat, perangusta esset incisio, seri substantia liquidior sponte primum exierat, Chylus verò concretior, aliqualem manus adstringentis tactum, vt inuitè erumperet opperiebatur; Itaque tria & amplius veri Chyli albedinem & consistentiam lacteam habentis Cochlearia, palam, & in omnium, qui spectatores aderant, oculis pressum effudit receptaculum, ac eo sic exinanito reperti sunt *Pecquetiani Canales*, omni ferè Chylo vacui. Denique receptaculum totum partemque Aortæ, dictos canales Thoracicòs, partemque item Venæ subclauia sinistra, solutâ quam cum aliis partibus habebat connexionem, satis commodè sejunxi ac detraxi, quæ quidem omnia, & alia id genus multa accuratè expurgata in Musæo meo secretius & sanctius asseruo, vt eorum, qui ista deinceps videre cupierint, curiositati abundè possit satisfieri.

Præterea, quadriduo circiter postquam hæc à me gesta sunt, & apertè demonstrata, *D. Guiffartus* clarissimus Medicus, & Collega meus, à supremo Senatu mulieris cuiusdam patibulo adiu-

dicata cadauer impetrauit, quod à perito Chirurgo cognominato *la Bale* incisione aperiendum curauit; sed quia ipso suæ mortis die ab omni ferè cibo illa abstinuerat, in eius corpore receptaculum inane prorsus & vacuum inuentum est, nec vllum, multis licet in locis incisum, Chylum reddidit.

Porro illud facilè distinctum ab aliis partibus probauerunt eminentes multæ velut Vesiculæ membranosæ adipe circumcinctæ, tenellis intercisæ glandulis, ex eoque visus est nasci Canalis Thoracicus sinister, multis & variis flexibus intortus pluribus fibris per singulos plexus ad vicinas partes alligatus, qui eò eminentior apparebat, quo pleniori turgebat sero, quod quidem lactis sero persimile prodiit, nec vilo modo dissimile illius, quod suprâ memorauimus ex prædicti cadaueris receptaculo.


Hoc autem nihil aliud fuisse, quàm Chylum iam alteratum, omnino mihi persuasum est, si quidem illico post mortem Chylus in receptaculo & Canalibus Pecquetianis degenerat, & in serosum humorem conuertitur, licet tardiùs in Venis Lacteis Asellianis huiusmodi alteratione corrumpatur. In vltimo enim à me dissecto cadauere, quarto adhuc post mortem die nonnullas Venas Lacteas Mesentericas ostendi humore planè lacteo albicantes. Cur autem diutius integer conseruetur Chylus in Venis Lacteis Asellianis, quàm in Pecquetianis, Vni tibi quæstionem hanc enucleare facile est, eiusque à Te vno solutionem præstolamur, nisi Tibi arrideat ratio ex Venarum Asellianarum exilitate & Thoracicarum

maiori amplitudine desumpta , vnde in his non
ita coangustati Spiritus facilius resoluatur. Quia
verò post demonstratam Canalis Thoracici si-
nistri partem euocatus sum ad inuiscendos peri-
culosè ægrotantes , quid postea gestum sit vlte-
rius in dicto mulieris cadauere disseccando , ne-
sciebam , nisi quod post dies aliquot , referente
prædicto *la Bale* , Chirurgo , accepi , non fuisse
quæsitum Canalem Thoracicum dextrum , imò
nec reliquam Canalis sinistri partem detectam
fuisse ; propter varia quæ ipsi tunc temporis ne-
gotia contigerant.

Cæterùm , hæc omnia idcirco tantùm addidi,
vt res à nobis obseruatas ad Te referrem , vtpo-
te quarum iudicium ad nullum alium meliori iu-
re pertineat. In his igitur à Te tua opitulante in-
dulgentia pulcherrimas, verissimas , & doctissi-
mas decisiones tuas sperare confidentiùs ausi su-
mus. Plurimùm vale , teque felicem ad multos
annos & incolumem Orbi seruet , qui te nobis
dedit Deus optimus, Maximus.

Rethomagi , 29. Martij

1655



PRÆSTANTISSIMO VIRO,
D. CAROLO LE NOBLE,
Doctori Medico Rothomagensi;
& Anatomico peritissimo

IOANNES RIOLANVS S. D.



ON possum satis laudare tuam veteris Medicinæ obseruantiam, & culturam, vt animaduerto, ex tuo Opusculo erudito, de *Venis Lacteis Thoracicis*, in quo restituis Hepati suum officium sanguificandi, quod insolenter admodum *Pecquetus*, eiusque sectatores duo Medici Parisienses, *Mantellus* & *Mersennus* ei præripere conantur. Proh facinus horrendum, in dedecus Scholæ Parisiensis, deterius ipsâ probatione Antimonij, de quo nunc animosè certatur.

Ab initio Mundi & creato Adamo hanc prærogatiuam Iecur obtinuit, tot sæculorum spatiis confirmatam possessionem ei nunc denegare iniquum, ne dicam impium. Pontificiis Imperatoriisque sanctionibus cautum est, ne cui longæua & indubitata possessio auferatur; atque *Valentiniani Augusti* hæc Principe digna vox fuit; *Quis ferat institui iurgia, quæ aui proauique nesciuerunt? quenam alia improbum litigatorem tam valida de-*

*ensio summouebit, si neque sacula in infinitum non
 defendunt? Adiungam illud Senecæ; Id verum
 est, in quo plurimæ gentes consentiunt. Tu verò adeo
 validis & inuictis rationibus Hepati ius & offi-
 cium sanguificandi asseruisti, vt non sit amplius
 ea de re dubitandum. Tuis adhuc hanc rationem
 addam. Cor principale totius corporis mem-
 brum non potest nili quàm vno fungi officio, ex
 Aristotele; primo Polit. Nihil tale efficit Natura,
 quale fabri ferrarij Gladium Delphicum, parcè;
 tenuiter & angustè, sed singula ad singulos vsus;
 sic enim absolutissimum & perfectissimum fuerit
 vnumquodque instrumentum, si non multis ope-
 ribus, sed vni seruiat. Id exemplis Cordis & He-
 patis demonstrabo. Cor principale corporis
 membrum non potest, nec debet nisi quàm vnico
 fungi officio, quod est Sanguinem assiduè attra-
 here, ex Hepate proximo, vt reddat arteriosum.
 Id præstat calore suo; Calor ille insitus excitatur
 & fouetur, eius motu perpetuo dilatationis &
 constrictionis, vt attractum Sanguinem per Ve-
 nas, mox in Corde excalefactum per arterias ex-
 pellat, in vniuersum corpus, ad restaurandum &
 conseruandum calorem partium remotarum, at-
 que vt indefinèter Cor moueatur, & vt istam vni-
 cam actionem edat, Sanguinis Circularis in Cor-
 de diu noctuque necessaria est. Iecoris vnicum
 est officium sanguificatio. In vestibulo Iecoris;
 id est Vena Porta fit separatio excrementorum
 manifesta, bilis, & humoris melancholici à parti-
 bus attrahentibus istos humores excrementitios,
 tumque remanet sanguis purus & sincerus, diffu-
 sus per substantiam Hepatis, vbi excoquitur, &*

præparatur Cordi. Propterea ineptum & ridiculum istud officium, bilem solam eliciendi ex Sanguine ad eam partem refluo per venas, & novum istud officium nuper adnexum à Bartholino, & à Pecquero confirmatum, aquas puras dulces colligendi & refundendi in receptaculum Lacteum, ut deducantur ad Cor. Itaque jecur diuersas substantias trahet, & continebit, amarissimas & dulces, atque per diuersos Canales expurgabit. Ergo Cor erit Archimagirus, jecur lixa, siue Aquarius, suppeditans aquas, ad evertenda vasa Lactea.

Dum hoc scribo, mihi succutrit altera ratio non contemnenda; si inter duos renes situm est Chyli receptaculum, tenuissima membrana cinctum, renes sæpe ratione copiosi adipis circumfusi, sunt obnoxij amplis tumoribus, qui in abscessus degenerant, & sanantur Cauterio profunde adacto, usque ad renem: Tum necessum est istud receptaculum Chyli grauiter affici, erodi ac putrescere, ex fluitante pure inter duos renes, Nihilominus consumpto receptaculo ægri viuunt, & post sanationem diu sunt superstites. Inde colligo nullum Chylum ad Cor quotidie reperire, sed ad jecur totum deferri: hunc affectum designauit Aristoteles, & περιέφερα vocauit.

Tu vero, VIR NOBILIS, istas Venas Lacteas alteri vsui destinās, qui probabilis est, & ad meas coniecturas accedit, scilicet sanguinem Chylo conflatum in Hepate, uniformem esse, sordibus suis defæcatum, tenuiorem vero Chylum per Venas Lacteas ad Cor deductum, arterioso Sanguini permisceri, ut aliqua ex parte pituitosus reddatur;

reddatur; quæ substantia in sanguine necessaria est, vt partes Spermaticas quam plures in corpore nutriat, quæ talem sanguinem desiderant. Sed Hippocrates lib. 1. de Natura humana, & Galenus variis in locis scribunt, sanguinem in Hepate crassioribus, sordibus variis depuratum, remanere adhuc multiformem, ex quatuor humoribus conflatum, vt partes nostri corporis variæ substantia & temperamento, inueniant alimentum sibi analogum; atque prout alteruter humor desciscit ab ista vnione, & prædominatur aliis, inde morbi varij in corpore generantur. Tuam coniecturam probabilem non repudio, neque meis coniecturis renuntiabo.

Quod spectat ad tuam Observationem factam in corporibus humanis bene pastis vt decet, quinque horis ante strangulationem, mox dissectis: Miror & laudo tuam curiositatem, quæ id impetrauit ab æquissimo Senatu Rothomagensi, boni publici amantissimo, vbi publicè demonstrasti istas Venas Lacteas Mesentericas & Thoracicas. Tua descriptio in homine discrepat ab ea quam delineauit Pecquetus in Canibus, longè dissimilis à Bartholini descriptione in Homine. Tuæ relationi magis fido, quum agnoscam te valde peritum, & deditum rebus Anatomicis, atque manu propria id opus agitâris. Verum ratione itineris flexuosi, & amborum canalium coitus in vnum ramum sinistrum, Non credo magnam portionem Chyli ascendere ad subclauias. Fateor tuum scrutinium Anatomicum admirabile præ cæteris mihi placere, & dignum iudico editione publicâ, vt omnes, qui nouitatibus delectantur, rei verita-

tem à Te descriptam agnoscant , quam scripti
meis testabor , atque Tibi ero in æternum deuin-
ctissimus, propter studia nostra Anatomica com-
munia, quæ nunquam deseram quamdiu spiritu
hos reget artus , tuisque cœptis semper fauebo.

*Nec Deus intersit , nisi nodus vindicæ dignus
Inciderit.*





APPENDIX

ad Epistolam Riolani.



QUONIAM hodierna Anatomē, & peritia Medici, ab ignavis veræ Medicinæ reputatur consistere in cognitione & demonstratione Venarum Lactearum Mesentericarum & Thoracicarum, neglecta cadauerum humanorum Anatomica scientiâ, qualis in Scholis docetur, & inde multum se profecisse putant in Medicina, dum asserunt Cor hæmatoseos esse officinam; Iecur bilis reconditorium, & Vasorum Lymphaticorum scaturiginem, Illos omnes, qui tractant istam Anatomem eo modo cum iactantia & ostentatione intolerabili, insanire sustineo, dum se vocant veræ sapientiæ Anatomicae cultores & possessores: Alios mutæ frigidæque Anatomies, Professores appellant: Itaque proposui manifestè demonstrare illorum inscitiam & imperitiam in rebus Anatomicis.

Atque ut perspicua sit & intelligibilis nostra demonstratio, prius ostendam in Cadauere humano vnica lectione duarum horarum, absque vlla laceratione, parcium Vitalium in Thorace, & Naturalium in alio, sedes & functiones. Aperto igitur Thorace, cum eleuatione sterni, & ab-

domine reſerato, reuulſis ad latera pulmonibus, indicabo Venæ Cauæ bifurcationem in iugulo. Dein eiſdem Venæ progreſſum uſque ad Diaphragma, atque ſciſſo Pericardio, truncus Cauæ, iuxta Cor apparebit continuus non bifidus ut Aorta, latere ſiniſtro adaperſus, & affixus dextro Cordis ventriculo. Ipſum Cor ratione Pericardij adhærentis centro nerueo Diaphragmati ad eam partem reuulſum, Diaphragma in circuitu Thoracis circumdatum ſeparare culinam & conclauem Cordis. Notanda etiam diſtantiâ ſemibubitalis trunci Cauæ ab axillaribus uſque ad aperturam eiſdem Venæ Cauæ iuxta Cor. Poſtea demonſtro iſtud foramen Venæ Cauæ intra Thoracem, proximum eſſe Diaphragmati. Præterea Oeſophagum, & Aortæ truncum bifidum, hæc continentur in Thorace notabilia. His obſeruatis deſcendo ad aluum, ubi manu reuulſe ſurſum iecinore, diſtractis ad latera ſiniſtrum inteſtinis, manibus adſtantium adiutus, detego Venam Portam & Venam Cauam pancreatæ vnguibus laceratò, tumq; patefacio truncum inferiore Venæ Cauæ eſſe continuationem ſuperioris, ſine ulla interruptione in Hepate, ſed tantum eiſdem baſi ſecundum longitudinē adhærere: juxta verticem Iecoris duas Venas ab eo prædeuntes. Dein notanda veniunt Aorta proxima Cauæ, Pâncreas vnguibus diuulſum, Ventriculus ei ſuperiectus, lien proximus in hypochondrio ſiniſtro ſitus. His peractis oſtendo functiones partium, in Thorace Oeſophagum deducere alimentum ad Ventriculum: Cor excipere ſanguinem per Venam Cauam: Aortam tranſmittere per ſuos Canales ſan-

guinē arteriosum in vniuersum corpus: & discisso
 Corde internam structuram ventriculorum cum
 septo demonstro, & Diaphragma instrumentum
 liberæ respirationis, & flabellū abdominis, in quo
 considero intestina admittere alimentū subactum
 in ventriculo, & deuoluere secundum tenuiorum
 longitudinem, vt à Mesaraïcis vndiquaque exsu-
 gatur; Iecur verò per Venas Mesaraïcas Chylū
 ad se trahere, lienem proleſtare humorem melan-
 cholicum ab Hepate per ramum splenicū portæ:
 cystim felleam, bilem; Tandem ab adstantibus
 considerari cupio vasorum amplitudinem, vige-
 ties capaciorē Lacteis Venis Thoracicis; imò
 Venas vnius manus aut pedis esse ampliores istis
 tubulis Thoracicis, vt intelligatis longè dispa-
 rem esse proportionem Venarum & Arteriarum
*cum istis tubulis, qui totum Chylum ad Cor deferre per-
 hibentur*, quum tamen ratione copiosi Chyli as-
 cendentis ad Cor, propter dissipationem sangui-
 nis, in nutritu Corporis, capacitas Thoraci-
 carum deberet esse amplior, & æqualis in fine &
 origine, quod non reperitur in istis Lacteis Ve-
 nis Thoracicis.

Atque in illo canali longitudinali Venæ Ca-
 uæ à iugulo vsque ad Crurales Venas nullas val-
 uulas adesse demonstrabo, vt detur libertas san-
 guini excurrenti ab infernis partibus ad super-
 nas, & vicissim à supernis ad infernas, sanguis
 enim ascendens iuxta Cor non sistitur, vt coga-
 tur subire Ventriculum cordis, neque descendens
 à iugulo sistitur prope Cor. Potest habere suum
 excursus vsque ad crurales, vbi incipiunt Val-
 uulæ apparere, vt supernè quatuor digitos infra

axillares Venas sitæ sunt Valuulæ. Ex illa cognitione certa per inspectionem Venæ Cauæ incisæ, cognosces Chylum ab axillaribus non directè deferri ad Cor, sed fluitare posse supra vel infra Cor, per Cauæ longitudinem cum sanguine. Istud experimentum non potest fieri, nisi postremo loco. Deinde asseuero in homine sano bis tere in die largiter comedente, vix semel intra vnum diem totum sanguinem corporis Circulari, quia Cor non auidissimè haurit sanguinem pleno gurgite, sed guttatim instillatum cum delectu, & quantum indiget, ideoque Chylus si eo migrat non ingreditur Cor, nisi lentè admodum permixtus sanguini, Nec potest propter suam crassitiem facile transire per foraminula septi Cordis, imò in Corde potest hære in faueolis, & scrobiculis, & filamentis innumeris Valuulatum tricuspidum; Non labitur sanguis infusus Cordi per pulmones, nisi cogente necessitate, quod accuratè demonstraui, *contra Harueum, & Slegelium*. Hoc Pecqueto incumbit probandum, scilicet sanguinem & cum eo Chylum traduci per pulmones. Nec est necessaria repetita sæpe Circulatio sanguinis ad recoquendum sanguinem & conseruandum calorem totius corporis, quoniam arteriosus sanguis calidissimus quoquoersum continuò fluens & singulis momentis renouatus sufficit ad instaurationem caloris vniuersi corporis, multò minus ad requoquendum sanguinem imperfectè elaboratū in Corde vt asseritur.

Addo, cum in Trunco Cauæ nullus sit Deus Terminus, qui definiat limites ascendenti & descendenti iuxta Cor, vt ascendens sanguis præ-

beat locum descendentem cum Chylo ; verisimile est sanguinem ascendentem impulsus à spiritibus , interdum flatibus continenter assurgere ad iugulum , posseque subire Venam Iugularem internam , ni pessulum ostio obdidisset Natura , ne irruat in cerebrum , pariatque apoplexiam. Ergo stabit Chylus in axillaribus, nec perueniet ad Cor, defectu sanguinis supernè ruentis in Cor.

Præterea , in Pletora ad Vasa , repletio vasorum potissimum continetur in Vena Caua , inde Cor premitur , atque penè suffocatur , nisi depleatur ad auertendam Syncopem Cardiacam, de qua Hipp. & Gal. tractarunt lib. 4. de victu in acutis. At quando adest illa Plethora , sanguis artuum superiorum & cerebri non liberè fluit in Cor, nisi paulatim solus ascendens occupet totam longitudinem Cauæ , ergo Chylus non potest liberè ad Cor meare.

Demonstravi ex Hipp. & Gal. magnam morborum partem oriri ex motu sanguinis intercepto in Vena Caua, tùmque languet , Cor pulsu intercepto. Tunc quomodo fiet hæmatosis in Corde , interea non deficit nutritio Corporis, quia Venæ & Arteriæ per Anastomoses mutuas inter se communicantes suum sanguinem sibi inuicem communicant , ad conseruationem corporis , multique absque detractione sanguinis per inedias diatritarias minuūt istam sanguinis vbertatem Cor suffocantem. Quod si contingat , vt sæpissimè accidit, Ventriculos Cordis obturari ab isto sanguine crasso , ex permixtione Chyli conflatato , breui moriendum est , quod non accidit in illa hæmatosi facta in Hepate, quia Splen Hepatis

officio fungitur , dum per Venas Mesaraïcas deferitur sanguis , atque per istos tubulos lacteos Chylus in summa necessitate potest deferri ad Cor. Eam ob rem communicant inter se istæ Venæ, Porta & Caua in partibus superioribus ; magna Naturæ prouidentia, ne pereat animal, defectu sanguificationis.

Quia sanguificatio in Corde facta , habet pro fundamento Circulationē sanguinis *Harueianam*, quā cessante , nulla foret sanguificatio in Corde : operæpretium est scire , an *Pecquetus* eius doctrinam obseruet, in omnibus suis articulis; Nam *Harueus* Venas Lacteas admittit , sed Mesentericas esse statuit, lactescere, dum Chylo turgent; per has Chylum ad Hepar deferri, ibi suis excrementis expurgari omnem Chylum , per Hepar transeuntem; Præterea sanguinem ab Hepate ad Cor delatum , veloci cursu vniuersum corpus circuire intra vnā aut alterā horā. Nunc peto, an motum istum circularem sanguinis motus Chyli sequatur? quia deest accommodatum Chyli vehiculum , scilicet refluxus sanguinis moderatus ad Cor, è partibus superioribus descendens. Deinde per exilia foraminula vnius tubuli Lactei, non potest ascendens Chylus sibi viam facere, & æquo passu ire cum sanguine, quia Cor in vnaquaque systole effundit sanguinis seminiunciam veloci cursu , in quo nullam moram, nec alterationem in Corde potest habere Chylus, si credimus *Harueo* , *Vualæo* , & aliis Anatomicis. Parcior fuit *Riolanus* , & celeritatem motus retardauit. At Chylus in ista Circulatione, quantum caloris adeptus est intra arterias , tan-

tandem frigoris accipiet intra venas, quando re-
 meabit ad Cor, vt recoquatur, ex *Haruei doctri-*
na, nam eo fine ad eum locum recurrit. At *Rio-*
lanus negauit & probauit sanguinem primæ re-
 gionis circulari, atque sanguinem primæ & tertiæ
 coctionis effusum in omnes extremas & extimas
 corporis partes refluere ad Cor, nisi adsit maxi-
 ma penuria sanguinis intra maiora vasa: Nec
 sanguinem per pulmones circulari nisi cogente
 necessitate. Ergo sanguis ille impurus remane-
 bit, ad nutritionem partium vniuersi corporis, &
 sic pessimè nutrietur corpus. Ego verò asseuero
 Circulationem sanguinis *Harueianam*, non esse
 absolutè vitæ necessariam ad recoquendum san-
 guinem, spirituum restorationem, nisi corre-
 cta fuerit, vt ipse præscripsi. Præfero *Hippocra-*
ticam in qua sanguis Venæ Causæ ascendentis vs-
 que ad subclauias continetur. Vnde Cor deprom-
 it suum sanguinem, ad generationem sanguinis
 arteriosi, absque impetu & cum delectu, atque
 motus perpetui in Corde conseruationem, quan-
 tum indiget, absque vlla oppressione & violen-
 tia. His positis, perit ista sanguificatio in Corde,
 & absque ista sanguificatione potest viuere ani-
 mal, non autem deficiente sanguificatione facta
 in Hepate, & tubuli Thoracici Lactei non habe-
 bunt usum, quem illis tribuit *Pecquetus*, sed dun-
 taxat eum usum obtinebunt, quem in iudicio
 nouo assignaui, in quo præter alios vsus consi-
 sto: Nec eum ausi sunt *Pecquetus* & duo *Doctores*
Parisienses reprehendere.

Absolutâ breuiter ista demonstratione præce-
 denti in corpore humano bene pasto, & quinque

horis à pastu, strangulato, propero ad detegendum Venas Lacteas Mesentericas, & receptaculum, atque manifestè demonstro istam disparitatem venarum Lactearum Thoracicarum capacitatem, & receptaculi exiguum spatium continendo Chylo, atque supra Mesenterium Venas dispersas in receptaculum fluentes, persequendo, tubulos Lacteos Thoracicos ad axillares Venas, observo, esse anfractuosa, & in vnum coire ramum sinistram, qui affigitur axillari sinistra, interdum dextra. Inde cognosces paucum esse Chylum, qui eò deferatur, ideoque datur occasio dubitandi, si ad Cor totus Chylus deferatur, & quo fine; si ad Cor non perveniat, ad quid prodest ascensus Chyli ad partes superiores. In eo Cardio quæstionis vertitur. Meas coniecturas iam proposui, libello contra Pecquetum, & altero contra Bartholinum, quos legit Pecquetus, nec eis respondere potuit, quibus vnicam addo. Exigua illa portio Chyli Cordi illiquitur, ad reparandum illum adipem durum seuo simillimum Cordi circumfusum, qui permixtus sanguini per venas coronarias spargitur in Cordis superficiem. Forsan etiam ipsius Cordis substantiam duram carneam nutrit, quæ tale requirit alimentum. Qui melius coniectare poterit, is præclarus erit Anatomicus.

Principalibus Corporis functionibus diuersæ partes sunt assignatæ. Cor dicatum est fabricando sanguini arterioso ex subtilissimo sanguine, quem illi suppeditat Iecur proximum, ac proinde non potest ex Chylo, quia continuus affluxus Chyli diuersæ substantiæ à sanguine, minueret calorem Cordis, eique negotium facesseret, in

laborando sanguine arterioso, qui calorem cum Spiritu vitali subtilissimo impertit.

Id demonstro ex ineptissimo ratiocinio *Pecqueri*. Veram *αμαρτωσεως* officinam esse Cor, sic probat, Non fuit idonea tanta mutationi sanguinis in ascendente caua societas, ruit scilicet sanguis à cerebro temperamenti frigidi, & manibus externo frigori omnium membrorum maxime expositis, adde ipsius Chyli, qui etiamnum incoctus est frigidum pariter auctarium, & proinde ut in Corde perfectum calorem acquirit, ita dica in Corde Chylum in sanguinem commutari. Inde colligo ex isto sanguine admixto, sanguinem arteriosum in Corde frigidum præparari, & præsertim si transeat sanguis iste chylosus iam frigidus per pulmones, ubi ex continua attraxione aëris refrigeratur magis, conspurcatur, atque remeando ad sinistrum ventriculum isthæc incommoda potest creare, qualia notavi fieri in dextro.

Si ex Chylo in Corde pararetur sanguis, corpus nostrum præuè nutriretur; nam qui sunt gula & abdomini nati, & illi populi, qui sæpissime per duodecim horas esitant, potant à meridie usque ad mediam noctem, & saturi traduntur lecto, ex solo Chylo paucò sanguine asperso produceretur sanguis arteriosus, ac proinde esset impurissimus.

Suppomanus præualere maiorem sanguinis portionem; sanguis iste in utroque Cordis ventriculo erit impurissimus, non defæcatus suis sordibus, pituitâ, bile, tartaro, & lymphâ, quas deponit ex tua doctrina in cerebrum, in cystim felleam & Splenem, & Pancreas redeundo ad

Iecur , & qui primus nutrit partes superiores cerebrum & artus, retinebit istas sordes. Similiter qui reliquum corpus infra Cor nutrit , retinebit easdem sordes; nam arteriosus , qui decurrit in Cœliacam arteriam ad nutritionē partium aluinæ regionis , non est purus , nec defæcatur, nisi dum recurrit ad Iecur per Venam portæ ex *Pecqueto*, ibique depuratur, deponitque suam sorditiem: Atqui vix quarta pars sanguinis eò distribuitur, residuus sanguis ab extremis partibus recurrit per Venam Cauam ad Cor ; sine transiitione per Iecur , Ergo impurus adhuc deducitur ad Cor. Deinde Chylus non potest etiam immixtus sanguini sine aliqua mora in Corde alterari : Si transeat per pulmones non melius excoquetur, sed refrigerabitur ab aëre attracto , & conspurcabitur pituitosis excrementis , quæ generantur in pulmonibus , vel in eos delabuntur à capite. Ergo sordidior Chylus appellet ad sinistrum cordis ventriculum , præsertim in iis hominibus, qui non habent sanos & purissimos pulmones.

Certum est sanguinem purum defæcatum esse dulcem, quia solis dulcibus nutrimur, ex *Hippocrate* & *Aristotele* , atque in triplici coctione alimenti , fit sordium separatio ; At dum nutrimur falsis, piperatis, acribus eduliis, inde similis Chylus gignitur, cuius nulla fuit qualitatium facta secretio in ventriculo & intestinis tenuioribus; si talis Chylus falsus, acerrimus, piperatus ad Cor deferatur & pulmones , non potest non offendere istas partes , quamvis dulcoratus permixtione sanguinis , ac proinde partes illæ præuè nutriuntur, tam supra Cor puta Cerebrum & artus, quam

quæ sunt infra Cor, quia dumtaxat portio illa, quæ per arteriam celiacam influet, remeando per Venam portam defæcabitur in Hepate, ideò. que partes omnes aluinæ regionis pessimè nutriuntur illo sanguine primæ Circulationis.

Multa dubia mihi occurrunt, quæ tractationi Chyli ad Cor reluctari videntur. Nam ubi Chyli tractatio ad Cor absoluta & peracta est (inquit Pecquetus) disparent isti tubuli lactei Thoracici, cum ipso receptaculo, & in ieiunis animantibus non reperiuntur, quia partes istæ replentur sanguine. Quæro nunc, Vnde sanguis ille manat, quo partes illæ replentur? An à Venis Mesaraïcis, vel ab axillaribus? Si ab his, ergo sanguis descendit, contra leges Circulationis *Harveiana*: si à Venis Mesaraïcis, ergo isti tubuli sunt propagines Venæ Portæ, atque sanguis ab his refugit vel repellitur, dum Chyli fluxus irrui in has partes: si Chylus ascendens ad axillares Venas suum amittit colorem, nec lacteus decurrit ad Cor, cur idem denegatur chylo fluenti in truncum Mesentericum. Quid si dicerem cum *Schënckio*, summo Philosopho & Medico, Venas proprietate insita sanguificare, ut libello erudito demonstravit, & Iecoris substantiam vasis tantum inseruire circumfusam instar stœbes vel tomenti. Si fortiter exsuffletur Vena Porta, eius prius effuso sanguine videbis receptaculum, & Venas lacteas distendi, quod signum est manifestissimum vel esse propagines Portæ, vel cum eis communicare in receptaculo. Adde quod distantia itineris Chyli ad Hepar, per Venas Mesaraïcas est vnus palmi longitudine, in ascensu lactearum thoracicarum.

Istam variationem addo : Aues, pisces nutriuntur vt viuant, tanquam animalia bipeda & quadrupeda, habent Hepar, Cor, Intestina, Mesenterium, Aues etiam pulmones: at in illis nullæ sunt subclauia Venæ; nescio an sint tubuli Thoracici Lactei: si reperiantur non inferuntur supra Cor, sed infrà: In illis videmus Hepar plenum sanguinis, atque rectà ire ad Cor sanguinem. Si partes nutritiæ in istis animalibus ita sunt dispositæ, quoad vsus & actiones Hepatis, & Cordis, cur idem in aliis animalibus quadrupedibus & homine non fiet? nec Hepar in illis sanguificabit?

Rondeletius summus Anatomicus, lib. 3. de Piscibus, ita describit Cor piscium, qui pulmonibus respirant, nec ab animantium corde ferè differt, habet duas aures, duos sinus, Venas Arteriales, & Arterias Venales totidem, coronariam, Cauam, Pericardion: In omnibus fellis Vesica ex Hepate dependet, vt bilem ab Hepate exsugant: In quibusdam Hepati immersa est per Venulas bilem trahens, Cor semper est rubrum, sed iecinora Piscium sunt diuersi coloris, modò rubri, modò crocei, aliis cærulei coloris, vt Lampetræ: Inde iudicauit *Aristoteles*, sanguinem vt perfectionem suam recipiat in omnibus animalibus, ad Cor transire:

Consideret Lector in quas absurditates adducti sunt, qui *Pecquero* fauent de sanguificatione in Corde facta per ascensum Chyli ad Cor: *De sacrum & horribilem libellum*, à duobus Medicis Parisiensibus approbatum:

FINIS.

vinu
quadra
elente
ha sunt
toracich
ra Corp
languis
i partes
poliz
is, cur
hom
bit
de P
almon
ere dif
is Arte
nariam
Velica
re exlu
per Vel
un
odora
vt Lam
inem vt
animali
es add
ficatione
Cor : 1
Medici

